

# Váábu peerâ

Váábu lii 6-ahasâš nieidâ. Sust lii 3-ahasâš uccâviljâ, kiän nommâ lii Aaslâk já 17-ahasâš stuorrâuábbi, mon nommâ lii Sáará. Ton lasseen Váábu perrui kuullâv enni Iggá já eeči Jovná. Váábu eenist Igást láá uábih Ailâ já Liäiná. Ailâ lii Igá puárrásub uábbi ađai sun lii Váábu kuáski. Liäiná lii Igá nuorâb uábbi ađai sun lii Váábu muáđá. Igást, Aailâst já Liäinást lii meiddei viljâ, kiän nommâ lii Issá. Sun lii Váábu iänui. Iggá, Ailâ, Liäiná já Issá láá viälžá já sist láá siämmáá vanhimeh. Sii eeni nommâ lii Lyeme já eeji nommâ lii Saammâl. Lyeme lii Váábu ákku já Saammâl lii Váábu äijih.

Ailâ-kuáski lii naajâm ađai sust lii käälis, mon nommâ lii Vuolli. Sun lii Váábu maahâ. Liäiná-muáđást-uv lii käälis. Kállá nommâ lii Heikkâ já sun lii meiddei Váábu maahâ. Issá-ennust Márjá-nommâsâš nieidâskippáar kiäin sun áigu naajâđ. Máárjást šadda talle Váábu ime. Ailâ-kuáskist já Vuolli-maavâst iä lah párnááh. Liäiná-muáđást já Heikkâ-maavâst lii ohtâ nieidâ, kiän nommâ lii Miljá. Sun lii Váábu uárbimpeeli. Issá-ennust já Márjá-imesaasâst lii Mikkâl-nommâsâš kandâ já sun lii Váábu viljâpeeli.

Váábu eejist Jovnást lii uábbi, kiän nommâ lii Rávná. Rávná-siäsá ij lah naajâm ijge sust lah irge. Jovná-eejist já Rávná-siäsást lii puárrásub viljâ, kiän nommâ lii Irján. Váábu kočo suu eehin. Jovná-eejist, Rávná-siäsást já Irján-eevist lii ton lasseen meiddei nuorâb viljâ já suu nommâ lii Juhháán-Ánte. Sun lii Váábu čeeči. Irján-eevist já Juhháán-Ánte-čeesist lii kuohtuin Sunná-nommâsâš kálgu. Kuohtuuh Suunáh lává Váábu imeh. Suunáh iävá lah hyelhih, mutâ ko suoi lává siämmáá nommâsiih te suoi lává kääimih. Irján-eevist já Sunná-imest láá kyehti nieidâ ađai suoi lává Váábu uárbimpeelih. Juhháán-Ánte-čeesist já nube Sunná-imest láá kyehti kaandâ, kiäh lává Váábu viljâpeelih. Kaandah lává šoddâm siämmáá peeivi ađai suoi lává jyemeheh. Jovná, Rávná, Irján já Juhháán-Ánte láá viälžá ađai sist láá siämmáá vanhimeh. Sii eeni nommâ lii Siggá já eeji nommâ lii Kaabi. Siggá lii Váábu ákku já Kaabi lii Váábu äijih.

Maainâs: Heli Aikio

## Savâstállâm fáádáh:

- Mii lii Váábu uábi nommâ? Nabâi viiljâ nommâ?
- Mii Mikkâl lii Váábun?
- Kii lii Váábu uárbimpeeli?
- Lii-uv Irján Jovná-eeji nuorâb vâi puárrásub viljâ?
- Lii-uv Liäiná Iggá-eeji nuorâb vâi puárrásub uábbi?
- Kii lii Váábu iänui?
- Kiän eeči lii Kaabi?
- Kiän enni lii Lyeme?